

**Sekretáriu Estadu Konselhu Ministrus no
Porta-vóz Ofisiál Governu Timor-Leste nian
Ágio Pereira**

**30 Marsu 2010
Dili, Timor-Leste**



**Governu lansa portál eletróniku ofisiál tuir Política Nasionál foun kona-ba
Meius Komunikaun Sosiál**

Tanba hakarak halo modernizasaun ba sistemas komunikasoens Paíz nian no hadi'a prestasaun informasoens ba comunidade tomak iha rai laran no rai li'ur, mak Governu Xanana Gusmão sei lansa nia portál eletróniku founida, iha tersa-feira, lora 30 Marsu 2010, iha Díli.

Portál eletróniku ne'e halo ho lian tolu – tétun ho portuguêz, hanesan línguas nasionais; no inglês, ba hotu-hotu. Portál ne'e konta ho ekipa ida ne'ebé halo parte profisionais timór-oan balu iha Sekretaria Estadu Konselhu Ministrus, ne'ebé iha sira nia funsoens, halo mós jestaun ba meios komunikasaun sosiál i informasoens Governu nian.

Portál eletróniku sei hahú funsiona iha tersa-feira loro-kraik, dia 30 Marsu, ho enderesu hanesan tuir mai ne'e:

www.timor-leste.gov.tl

Portál ne'e sei hatama notísias ne'ebé foin sai ikus, iha mós seksaun kona-ba istória, ligasoens no rekursus importantes i Ministérius, eventus ne'ebé sei tuir mai, apresentasoens multimédia no asesu ba komunikadus imprensa Governu nian ne'ebé foin fó sai.

Portál eletróniku sei hanesan pontu asesu fundamentál ida ba explorasaun Timor-Leste hanesan Nasaun, no nu'udar hakat boot ida, hodi loke Paíz ne'e ba rede global ne'ebé luan liután, liuhusi utilizadores internet. Bele mós partilha tesidu kulturál Uniku no identidade nasional Paíz ne'e nian, no mós hamutuk ho comunidades mundu tomak promove Timor-Leste, hanesan aspetu ne'ebé importante liuhotu.

Lansamentu portál eletróniku ne'e halo parte Política Nasionál ida kona-ba Meius Komunikaun Sosiál (PNMCS) ne'ebé luan tebes, ne'ebé Konselhu Ministrus aprova tiha ona iha 24 Marsu 2010 no, entre buat seluktán, sei promove asesu ida ke boot liu ba fontes públikas informasoens nian, dezenvolve mekanizmus ne'ebé forte hodi halibur no halo disseminasaun informasoens iha Paíz ne'e laran, liu-liu iha áreas rurais, no loke oportunidades iha nível formasaun meios komunikasaun sosiál tanba hakarak hadi'a kuantidade ho qualidade profisionais nasionais iha área ida ne'e.

Prinsípiu fundamentál ne'ebé tonka metin PNMCS mak formalizasaun no melhoria iha meios komunikasaun sosiál nasaun nian, liuhusi mekanizmus lejislativus hodi defende nia independênsia, tuir prátika nível mundiál ne'ebé di'ak liu nian.

Nia polítika mak, iha eskema ida kona-ba akreditasaun profisional ne'ebé órgauns independentes meios komunikasaun sosiál nian sira sei kaer rasik, hodi nune'e bele hasa'e kbiit no garante katak sei proteje didi'ak jornalistas sira nia direitu, hodi hari metin meios komunikasaun sosiál ne'ebé justus, imparciais i independentes.

**K
O
M
U
N
I
K
A
D
U
B
A
I
M
P
R
E
N
S
A**

Sekretáriu Estadu Ágio Pereira, ne'ebé iha kotuk hanesan arkitetu ka badaen boot ba PNMCS, dehan katak "Instituisoens tomak iha Timor-Leste sei nurak hotu, nune'e mós ho meius komunikasaun sosiál. Tanba ne'e, mak ita presiza investe ba iha meius komunikasaun sosiál no desenvolve hanesan pilár independente Estadu nian ida, hodi nune'e ita bele aumenta transparênsia no responsabilizasaun i garante mós katak ita nia Nasaun ne'e akompanha notísias no eventus atuais hotu-hotu, atu nune'e, labele halo sala ka sai manipuladu tanba interferênsias. Polítika ida ne'e, defende dignidade profisaun no tulun nia evolusaun ba tempu naruk. Impaktu husi polítika ida ne'e iha desenvolvimentu nasional, haré ba kbiit boot atu kria empregu iha setór importante ida ne'e, nune'e mós ho reformas administrativas ne'ebé atu implementa, tuir Leis relevantes ne'ebé Parlamentu Nasionál aprova tiha ona, ne'e buat ida ke ita la bele mede." **FIM**

Ba informasoens seluktán favór kontakta:

Ágio Pereira +670 723 0011

Korreio eletróniku:

agiopereira@cdm.gov.tl

ou

govtlmedia@gmail.com

Portál eletróniku:

www.timor-leste.gov.tl